

2 Tesalonicenses

**Pablo cuti shuc cartata quilcan
Tesalonicaibi tiyac quiriccunama**

1 ¹Ñáuca, Silvanohuas, Timoteohuas caita quillcashash Tesalonica llactai auc quiric muntunma quillcaunchi. Canguna Yaya Diospa runaguna Señor Jesucristohuacpas anguichi. Paigunata tapuni cangunata llaquisha cungailla causaita cunauchun nisha.

²Yaya Diospas Señor Jescristohuas cangunata llaquisha alita rachun nisha mañasha tapuni.

**Jesus shamucpi juchayuccunata
Dios taripangami**

³Ñáucanchi Dioshuan cuintasha cangunamanda tucui uras paita pagrachu nisha rimana anchi. Canguna Yaya Diosta mas, mas yuyariushami yapa sinzhita quiriunguichi, chasnallata cangunapura tucui caran shucta yapa mas llaquinacushami causaunguichi. Chimandami Yaya Diosta pagrachu nisha rimana anchi. ⁴Canguna turmintarishallata, piñaitucushallata, Diosta mana saquisha ali quirisha causaunguichi. Chiraicu Diosta quiric muntungunata ñucanchillata cangunamanda cushihuan rimaunchi paiguna ali causanaunmi nisha.

⁵Canguna Jesusta quirishcamanda turmintariunguichi. Chasna turmintarishcamanda Yaya Dios

cangunata rimanga, balic manguichi ñuca ali mandanama yaicungahua nisha. Chasna tucupi Dios alita raushcata yachanguichimi.

⁶Yaya Dios alita rasha cangunata turmintachic runagunata taripasha turmintachingami.

⁷Paigunata taripasha canguna turmintarishcamanda ñucanchitas pai lugaryachingami. Chasna rangami Señor Jesus jahuapachamanda paihua ushaiyuc angelgunandi shamuusha sindiushca nina ucui shamushcái.

⁸Chasna shamucpi tucui Diosta mana yuyaric runagunata, Señor Jesus quishpicic man nishca shimita mana uyac runagunatas pai sinzhita cashtigangami. ⁹Paigunata taripasha cashtigashca tucusha Señor Jesuspa ñaupagmanda caruma saquishca tucungaunami, pahua gustu sumacta mana imas ricunaungachu. Chasna caudsayachishca tucusha huiñaigama mana cáilla turmintariungaunami.

¹⁰Chi punzhaibi Señor Jesus sumac shamuupi tucui paita quiric runaguna paicuinta sumac chuyac tucungaraunchi, paita ricusha balichisha alabangaraunchi. Chi punzhaibi cangunahuas ñucanchi yachachishcata uyasha quirishcamanda chasnallata tucunguichimi.

¹¹Chiraicu Yaya Dios cangunata cayasha japistha runaguna acpimi ñucanchi tucui uras cangunamandaga

mañapasha tapunchi pai
munashcashina causanauchun nisha.
Chasnallata canguna tucui ali rana
munaitas, tucui qurinamanda ranatas
paihua ushaihuan pactachichun
nisha mañauchi. ¹²Chasna
tucucpi ñucanchihua Yaya Dios,
Señor Jesucristohuas cangunata
llaquishcamandami canguna alita
rasha causasha Señor Jesuspa shutita
balichishca tucungami, pai chasnallata
cangunatas balichingami.

**Tucurina punzhaguna
ashcata ricuringaunami**

2 ¹⁻²Cunanga huaquiguna,
Señor Jesucristo shamucpi
ñucanchi paihan pariu tandarinata
yuyarichi. Ñáa maican runaguna
rimanaungami Señor Jesus shamuiga
pasashcami nisha. Maicangunaga
Pablo chasnami nira, Pablo chasnami
quillcara nisha rimaunguna. Chasna
rimagllaita ama manzharinguichu,
ama turbaringuichichu. ³Paiguna
imatas rimasha ama cangunata
umanauchun. Señor Jesus chara mana
ricuriugllaita runaguna Diosta yapa
piñasha pai munashcata mana ranata
munasha yapa cuntar tucungaunami.
Chasnallata tucui mandashcagunata
mana uyac, jiridsata rauc amuga
ricuringami. Paiga supaihua runa
man, ucupachama cachaitucuna runa
man. ⁴Chi runami Diostas, tucui
alabashcagunatahuas piñasha jarcanga.
Diosta alabana randimanda ñucallata
yuyarisha balichihuai nishami
rimangami. Chasna rimasha Diospa
alabana huasibi tiyaringami ñucaga
Dios mani nisha.
⁵Cungarishcanguichichu ñuca
cangunahuan tiyaushcaibi tucui
caigunata rimasha yachachiurani.
⁶Chi runa ricurina punzhagama

paita jarcaucta yachanguichimi.
⁷Cunallata ima mandashcata
mana uyac runaguna yapa jiridsata
pacalla ranaun. Chasna agllaita paita
cunan jarcariaucta anchuchicpiga
ricuringami. ⁸Chi jarcaucta
anchuchishcahuashaga, chi yapa
jiridsata rauc amuga ricurimungami.
Ricuric tiyagllaita Señor Jesus
shamusha paihua samaihuanmi
chi runata binsingami, paihua
punzhaglla ushaihuan huanchisha
chingachingami. ⁹Paita binsina
uras chara mana pactachigllaita
chi ima mandashcagunatas mana
uyasha jiridsata rauc runaga
Satanaspa umachina ushaihuanmi
shamunga. Yapa ushaihuan pihius
mana rashcagunatas manzhanayacta
rasha ricuchingami runagunata
umasha binsisha nisha. ¹⁰Chasnallata
tucui ima tunu mana aligunata
rasha ucupachama riuc runagunata
umangami. Paiguna Jesusmanda sirtu
shimita mana quirinata munanaunzhu
quishpichishca tucungahua. ¹¹Chiraicu
paiguna chasna mana munanaupi
Dios lugarta cun paiguna shuc jatun
umana llullashcata quirinauchun nisha.
¹²Chasna asha Jesus sirtu quishpichic
ashcata mana quirisha, randi jucha
ranata yapa gustasha Diospacpi ali
caudsayachishca taripaitucungaunami.

**Quishpichingahua Dios
cangunata japistcamanda**

¹³Chasna tucucpis huaquiguna,
Señor Jesusca cangunata llaquinmi.
Callari urasmandapacha Yaya Dios
cangunata japiro canguna Jesusmanda
sirtu shimita quiriccuna tucungahua,
canguna paihua Samai ushaihuan
jucha illac sumac tucungahua
japiro. Chiraicu ñucanchi tucui uras
cangunamanda Diosta pagrachu

nisha rimana manchi.¹⁴ Canguna ñucanchi Jesus quishpichinmi nisha camachishcata uyasha Yaya Dios cayashcata pactachiranguichi. Pai cangunata cayasha japiro ñucanchihua Señor Jesucristo pariu paicuina sumac tucuchun nisha.¹⁵ Chasna acpi huauquiguna, ama manzharisha sinzhi aichi. Ñaucanchi sirtu yachachishcata ima saquisha catinguchi, ñucanchi camachishcatas, quillcasha yachachishcatahuas pacta yuarisha catichi.

¹⁶ Ñaucanchihua Señor Jesucristollata, Yaya Diospas ñucanchita llaquic ashami ñucanchita huiñaigama ali yuyaita cura ñucanchi imatas ahuantangahua, pai rangaraushcatas chapangahua. Pai llaquishcamandami chasna ñucanchima cushca.¹⁷ Chasna cushcamanda Yaya Dios cangunata ahuantachisha sinzhiyachichun nisha tapunchi canguna ima aligunatas rangahua, alita rimangahua yuyaita cuchun nisha mañauchi.

Ñaucanchimanda Dioshuan cuintasha mañaichi

3 ¹Cunanga huauquiguna, ñucanchimanda Diosta tapusha mañaichi. Señor Jesusmanda shimita camachishcata canguna alita uyasha balichisha quirishcacuenta, ashca runaguna Jesusta ucta quirinauchun nisha mañaichi.² Mana tucuigunga Señor Jesustaga quirinata munanaunzhu, chiraicu Jesusmanda camachishcata saquichi nisha rimanaunmi. Chi mana ali rac runagunahua maquimanda ñucanchi llushpirishca tucushunchi nisha Diosta mañaichi.³ Chasna acpihuas Señor Jesus randi ali pactachic asha cangunata sinzhiyachingami,

cangunata ali cuirangami supai ima huaglichinamandas cangunata ama bisingahua.⁴ Canguna chasna Jesucristohua runa ashcamanda yachanchi ñucanchi mandashcagunata cunan pactachiunguichimi, chasnallata canguna mana saquishachu pactachisha causangamiraunguichi.⁵ Señor Jesus yanapachun canguna Yaya Dios llaquishcata yuyaringahua nisha mañauchi. Ima llaqui shamucpihuas Jesucristocuuntallata ali shunguhuan ahuantana ushaita cuchun nisha mañasha paita tapuunchi.

Tarabana anchi

⁶ Chasna acpi huauquiguna, ñucanchi Señor Jesucristo niccuuntallata mandanchi: maican quiriccuna quillasha ñucanchi yachachishcata mana uyacpiga paigunahuagmanda anchurisha ima paigunahuan puringuichichu.⁷ Cangunallata yachanguichimi ñucanchi imasna causashcashina cangunas causana anguichi. Ñaucanchi cangunahuan tiyaushcai mana quillashachu causauranchi.⁸ Mana yangamanda carahuanauchun nisha yuyariranchichu, astahuuanbas ñucanchi micunata pagangahuaca tarabauranchi. Tutandi punzhandi sinzhita tarabaranchi cangunamanda ama pitas yanga gastachingahua.⁹ Camachic runa ashami ñucanchita caranauchun nisha mandanata usharanchimi. Chasna ashallata tarabaranchimi canguna ñucanchita ricusha chasnallata rasha causanauchun nisha.¹⁰ Ñaucanchi cangunahuan tiyaushcaibi casna mandaranchi: Maican quillasha mana tarabanata munac runataga ama caraichichu nisha.

¹¹ Cunán uyashcanchi maican cangunahuacpi tiyauc runa quillasha

tiyaucta. Paiguna quillasha mana tarabanaunzhu randi shuccunahuacpi satirisiqui aucta uyaranchi. ¹²Señor Jesucristo nicshinallatami chicuinta rauc runagunata cunan mandanchi: Paiguna ali causanauchun, quiquin maquihuan tarabashami micunauchun nisha mandanchi. ¹³Cangunaga ali ranatas ama sambayasha saquinguichichu llaquishca huauquigua.

¹⁴Maican runa cai quillcaibi ñucanchi yachachishca shimigunata mana uyacpiga paihuas imatas ama raichichu. Mana pihuas paihuas puricpiga paiga pingarishca tucunga, chasna racpi tucuchun. ¹⁵Astahuanbas ama piñashcatacuenta chasna raichichu astahuanbas pai

quiric huauqui ashcamanda ali shimihuanmi rimasha alichichi.

Dispirishca

¹⁶Cungaila causaita cuc Señor Jesusllata tucui uras ima tucupihuas cangunama cungaila causaita euchun nisha mañauni. Señor Jesucristo tucui cangunahuan tiyauchun nini.

¹⁷Caita quillcacca Pablo mani. Ñáuca quiquin maquihuanmi quillcashsha saluduta cangunama cachani. Casna firmani tucui ñuca quillcashca quillcagunata. Cunanbas ñuca casna quillcani.

¹⁸Señor Jesucristo cangunata llaquisha alita rachun nisha mañani. Chillata rimani, Pablo.